

Encuentro historico entre Comision di Subsidio y Comite Olimpico Arubano



NUNCA antes e dos instancianan asina importante pa e mundo di deporte di nos pais a reuni cu otro. Diahuebs, riba Valentine's Day, Comision di Subsidio pa Deporte y Comite Olimpico Arubano a sinta na mesa pa intercambia informacion tocante maneho di cada uno y con por coordina e maneho di ambas entidad miho riba otro. Ganado di un proceso asina ta e federacionnan y particularmente e deportistanan Arubano.

COA a tuma iniciativa pa e reunion, mirando cu den seno di e organizacion y conhuntamente cu e federacionnan miembro ta trahando riba un planificacion strategico integral pa e proximo cuater añanan, esta e ciclo olimpico 2013-2016. Den esaki e aspectonan tecnico-deportivo ta crucial, especificamente e proceso di preparacion di atletanan y entrenadornan, pero naturalmente tambe e desaroyo general di e organizacionnan deportivo.

Pa e ciclo actual Comite Olimpico Arubano tin na su disposicion fondonan financiero adicional pa yuda haci e plannan grandi cu ta existi realidad. Esaki ta posibel, danki na e apoyo cu COA ta ricibi for di su partnernan

internacional, Comite Olimpico Internacional (IOC) y e organizacion Deportiva Panamericana (ODEPA). Ta conoci tambe cu Ministro di Deporte, Dr. Richard Visser, tambe ta poniendo mas fondo disponibel pa deporte. Pa realmente ricibi e fondonan sin embargo, COA mester entrega un plan strategico pa e cuater añanan, loke desde comienzo di e aña aki ta den proceso di preparacion, conhuntamente cu e federacionnan deportivo. Comision di Subsidio y COA kier yega na un situacion den cua ta bon cla kico e necesidadnan di e mundo di deporte ta y pa aloca e recursonan disponibel di tal forma cu tur e necesidadnan aki wordo cubri. Asina so por garantisar un desaroyo positivo di nos deporte. Na final di e reunion e participantenan a constata cu e prome encuentro historico aki tabata uno sumamente positivo y cu en realidad ta existi un necesidad pa un comunicacion mas estrecho entre ambas organizacion. A palabra di lo programa mas reunion den futuro cercano, pa asina por profundisa e tema aki mas.

Un bon noticia pues pa e federacionnan deportivo y tambe pa e mundo di deporte en general.

